



Jadual Pembacaan Khutbah Jumaat

Siri 3/ 2024 (Mac Tahun 2024)

Bil.	Tajuk	Tarikh
1.	REFORMASI KOREKSIONAL MEMBANGUN PERADABAN	1 Mac 2024M/ 20 Syaaban 1445H
2.	PERSIAPAN BERTEMU MADRASAH RAMADHAN	8 Mac 2024M/ 27 Syaaban 1445H
3.	SEPERTIGA MALAM ANUGERAH TERINDAH	15 Mac 2024M/ 4 Ramadhan 1445H
4.	Khutbah sempena Nuzul al-Quran: MENGHAYATI TUJUAN AL-QURAN DITURUNKAN	22 Mac 2024M/ 11 Ramadhan 1445H
5.	TAWARAN EKSKLUSIF RAMADHAN	29 Mac 2024M/ 18 Ramadhan 1445H
Khutbah Kedua		

Dibiayai oleh:



Zakat Pulau Pinang

Diterbitkan oleh:



Jabatan Hal Ehwal Agama
Islam Pulau Pinang

Jawatankuasa Panel Semakan Teks Khutbah Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. YBhg. Ustaz Muhammad Fadzil bin Alias**
Pengarah, Yayasan Dakwah Islamiyah (YADIM) Pulau Pinang
- 3. YBhg. Ustaz Ahmad bin Hashim**
Penasihat, Pusat Pengajian Tahfiz Al-Quran (PPTQ)
Kolej Islam Teknologi Antarabangsa Pulau Pinang (KITAB)
- 4. YBhg. Ustaz Subki bin Mohamed**
Mantan Pensyarah Kanan, IPG Kampus Tuanku Bainun
- 5. YBhg. Dr. Mohamad Zaki bin Hj Abdul Halim**
Penolong Mufti, Bahagian Fatwa,
Jabatan Mufti Negeri Negeri Pulau Pinang
- 6. YBhg. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 7. YBhg. Tuan Ahmad Shahimi bin Senawi**
Pendakwah
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





SEPERTIGA MALAM ANUGERAH TERINDAH

15 Mac 2024M/ 4 Ramadhan 1445H

الْحَمْدُ لِلَّهِ مُقَلَّبِ اللَّيْلِ وَالنَّهَارِ، تَذَكِّرَةٌ وَتَبْصِرَةٌ لِأُولِي النُّهَى وَالِاعْتِبَارِ،
سُبْحَانَهُ الْكَرِيمِ الْمُنْعِمِ الْغَفَّارِ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ إِلَهَ الْأَوَّلِينَ وَالْآخِرِينَ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ، أَرْسَلَهُ اللَّهُ إِلَى النَّاسِ كَافَّةً بَشِيرًا وَنَذِيرًا.
اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ، فَيَا أَيُّهَا الْمُسْلِمُونَ! اتَّقُوا اللَّهَ! أَوْصِيَكُمْ وَإِيَّايَ بِتَقْوَى اللَّهِ فَقَدْ فَازَ
الْمُتَّقُونَ. قَالَ اللَّهُ تَعَالَى: يَا أَيُّهَا الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا
وَأَنْتُمْ مُسْلِمُونَ.

PARA TETAMU JUMAAT YANG DIKASIHI SEKALIAN,

Saya berpesan kepada diri sendiri dan menyeru sidang Jumaat
sekalian, marilah sama-sama kita meningkatkan ketaqwaan kepada Allah
سُبْحَانَهُ وَتَعَالَى dengan bersungguh-sungguh melaksanakan segala perintah-
Nya dan meninggalkan segala larangan-Nya. Mudah-mudahan kita
menikmati kesejahteraan dan keberkatan hidup serta mendapat
kebahagiaan di dunia dan di akhirat.

Sempena bulan Ramadhan yang mulia ini, suka khatib
mengingatkan bahawa kewajipan berpuasa bukanlah sesuatu yang harus
dipandang ringan. Ia berkait rapat dengan keimanan kita kepada Allah



سُبْحَانَهُ وَتَعَالَى. Tahap keimanan kita bergantung pada kesempurnaan puasa yang kita laksanakan pada bulan Ramadhan. Maka usahlah mencemarkan bulan yang mulia dengan perbuatan yang ditegah seperti makan minum di khalayak ramai. Perbuatan ini merupakan satu kesalahan di bawah Seksyen 15, Enakmen Kesalahan Jenayah Syariah Negeri Pulau Pinang 1996. Sekiranya disabitkan, boleh didenda tidak melebihi satu ribu ringgit atau penjara selama tempoh tidak lebih enam bulan atau kedua-duanya.

Marilah sama-sama kita hayati bicara mimbar pada hari Jumaat pertama bulan Ramadhan yang bertajuk: **“Sepertiga Malam, Anugerah Terindah.”**

HADIRIN SIDANG JUMAAT YANG DIRAHMATI ALLAH,

Benarkah satu pertiga terakhir malam itu indah? Di manakah tersembunyinya keindahan tersebut? Bagi menjawab dua soalan ini, pinjamkan seketika kepada khatib telinga dan fikiran tuan-tuan. Fokuskan perhatian kepada bait-bait kalam dalam bicara mimbar pada tengah hari ini, Insha-Allah, jawapannya akan kita temui.

Malam, sebagaimana yang kita semua sedia maklum, adalah saat untuk berehat bagi mengembalikan kesegaran, setelah seharian penat bekerja. Dalam hal ini, sebahagian manusia menggunakan **keseluruhan malam** untuk berehat agar kecergasan badan dapat dikembalikan secara maksimum. Sementara sebahagian yang lain, mungkin menggunakan **sebahagian besar malam** untuk berehat. Manakala kumpulan ketiga pula, menggunakan **sedikit sahaja waktu malam** untuk tidur dan rehat. Selebihnya digunakan untuk beribadah, bagi tujuan mendekatkan diri

kepada Allah **سُبْحَانَهُ وَتَعَالَى**.

Mereka tidak melakukannya secara terpilih dan menunggu bulan tertentu sahaja seperti Ramadhan untuk berqiyamullail. Ramadhan bukan titik mula dan penghujungnya serta bukan pula noktah penamat. Pengabdian kepada Allah berlaku secara berterusan selagi hayat dikandung badan. Ramadhan adalah kesempatan dan peluang untuk kita tingkatkan iman dan taqwa dengan cara memperbanyakkan amal soleh. Kualiti dan kuantiti ibadah yang dilakukan menjadi petunjuk dan ukuran kepada tahap kehambaan diri kepada Allah **سُبْحَانَهُ وَتَعَالَى**.

Istiqamah dan kesungguhan dalam menghidupkan malam tanpa mengira musim tertentu adalah salah satu ciri orang bertaqwa yang menjadi penghuni syurga di akhirat kelak. Firman Allah dalam Surah Az-Zariyat ayat 17:

كَانُوا قَلِيلًا مِّنَ اللَّيْلِ مَا يَهْجَعُونَ ﴿١٧﴾

Maksudnya: “Mereka sentiasa mengambil sedikit sahaja waktu malam mereka untuk tidur.”

MUSLIMIN YANG DIMULIAKAN ALLAH,

Satu pertiga akhir malam adalah detik yang sangat istimewa. Kemanisan bermunajat pada saat tersebut hanya dapat dirasa oleh hamba yang ikhlas dalam mencari redha Tuhannya. Munajatnya tidak lain dan tidak bukan, semata-mata demi meraih kasih Pencipta yang Maha Agung. Ketika manusia lain sedang diulit mimpi-mimpi indah, bertemankan bantal dan tilam empuk, hamba yang mendambakan rahmat dan kasih sayang Tuhannya sanggup meninggalkan kehangatan

tempat tidur. Kedinginan penghujung malam bukanlah penghalang bagi hamba yang menilai kelebihan satu pertiga terakhir malam dengan penilaian iman.

Sesungguhnya berkhalwat dalam keheningan malam membangkitkan kesyahduan jiwa. Terasa menusuk ke lubuk hati. Suasana yang tenang dan jauh dari kesibukan dunia memungkinkan seseorang hamba untuk lebih fokus merenungi makna kehidupan, hakikat diri, serta hubungan dengan Pencipta yang Maha Esa. Bangkitnya dari tidur semata-mata untuk bermunajat menyahut seruan yang Maha Agung. Sebuah hadis daripada Abu Hurairah رَضِيَ اللَّهُ عَنْهُ bahawa Rasulullah صَلَّى اللَّهُ عَلَيْهِ وَسَلَّمَ bersabda:

يَنْزِلُ رَبُّنَا تَبَارَكَ وَتَعَالَى كُلَّ لَيْلَةٍ إِلَى السَّمَاءِ الدُّنْيَا حِينَ يَبْقَى ثُلُثُ اللَّيْلِ الْآخِرِ، يَقُولُ:
مَنْ يَدْعُونِي، فَأَسْتَجِيبَ لَهُ، مَنْ يَسْأَلُنِي فَأُعْطِيَهُ، مَنْ يَسْتَغْفِرُنِي فَأَغْفِرَ لَهُ.

Maksudnya: “Tuhan kita turun ke langit dunia (tanpa kaifiat dan cara yang boleh difikirkan) pada setiap malam ketika sepertiga akhir malam. Allah berfirman: Sesiapa yang berdoa kepada-Ku maka Aku akan makbulkan untuknya. Sesiapa yang meminta kepada-Ku maka Aku akan berikan kepadanya. Sesiapa yang memohon keampunan kepada-Ku maka Aku akan mengampui.” (Hadis Riwayat al-Bukhari dan Muslim)

MUSLIM YANG DIMULIAKAN ALLAH,

Bayangkan dalam suasana dihimpit dengan pelbagai tekanan hidup dan kita berada dalam keadaan yang sangat memerlukan, ada pemimpin besar negara datang ke tempat kita, menawarkan pelbagai bantuan segera. Apakah reaksi kita? Pasti ada peluang bertemu dengan pemimpin

tersebut tidak kita sia-siakan. Kita akan datang dengan penuh harapan. Kita pasti akan merayu, agar tersenarai dalam kumpulan yang bakal menerima bantuan. Rasanya seperti ada sinar harapan menerangi kegelapan kesulitan hidup yang kita hadapi. Keengganan kita untuk merebut peluang keemasan yang mungkin tidak berulang, pastinya dianggap sombong dan dilabelkan dengan pelbagai label yang buruk.

Itu sikap kita dengan sesama makhluk, yang kudrat dan kekuatannya juga terbatas seperti kita. Bagaimana pula sikap kita terhadap yang Maha Kuasa? Tawaran seperti mana yang disebut dalam hadis Abu Hurairah tadi sentiasa terbuka luas tanpa mengira dalam kumpulan mana kita berada. Kumpulan B40 kah kita, M40 atau T20, semuanya mempunyai peluang yang sama rata. Kita semua adalah hamba Allah dan kita semua layak untuk memperoleh apa yang ditawarkan oleh Allah. Tawaran dan peluang tersebut berulang setiap malam sehinggalah bumi ini dihancurkan dengan tiupan sangkakala yang pertama. Yang menjadi persoalan, apakah kita bersegera menyahut seruan tersebut? Atau kita membiarkan peluang itu berlalu begitu sahaja?

Bersyukurlah, sekiranya kita diberi taufiq dan hidayah untuk bangkit meninggalkan tempat tidur, mengatur langkah untuk bersuci dan seterusnya melakukan *Qiyammullail*. Berdoa dan bermunajat kepada Allah serta memohon kebaikan dunia dan akhirat. Iman itu bukan satu angan-angan tetapi keyakinan yang terpasak teguh dalam jiwa dan dibuktikan dengan tindakan. Imam al-Alusi menafsirkan makna iman melalui kata-kata Imam Hassan al-Basri dengan katanya:

لَيْسَ الْإِيمَانُ بِالتَّمَنِّي، وَلَا بِالتَّحَلِّي، وَلَكِنْ مَا وَقَرَ فِي الْقَلْبِ وَصَدَّقَهُ الْعَمَلُ

Maksudnya: “Iman itu bukan hanya angan-angan, dan bukan juga perhiasan, akan tetapi iman adalah sesuatu yang terpasak di dalam hati dan dibenarkan dengan amalan.”

MUSLIMIN YANG DIMULIAKAN ALLAH,

Menghidupkan malam atau Qiyamullail dengan beribadah, lebih-lebih lagi pada bulan Ramadhan adalah sikap dan amalan para solihin. Impian menjadi insan soleh adalah cita-cita setiap mukmin. Sedar atau tidak, itulah yang kita panjatkan kepada Allah sekurang-kurangnya tujuh belas kali sehari semalam. Dalam setiap rakat solat fardhu, kita memohon kepada Allah agar diberi hidayah ke jalan yang lurus, jalan para Nabi, syuhada’ dan orang-orang soleh. Oleh itu, teladanilah jejak langkah mereka dengan melazimi Qiyamullail. Mudah-mudahan kita juga termasuk dalam golongan hamba yang tinggi darjat dan dipandang mulia oleh Allah **سُبْحَانَهُ وَتَعَالَى**. Imam at-Tirmizi merekodkan hadis daripada Abu Umamah **رَضِيَ اللَّهُ عَنْهُ** bahawa Nabi **صَلَّى اللَّهُ عَلَيْهِ وَسَلَّمَ** bersabda:

**عَلَيْكُمْ بِقِيَامِ اللَّيْلِ فَإِنَّهُ دَأْبُ الصَّالِحِينَ قَبْلَكُمْ وَهُوَ قُرْبَةٌ إِلَى رَبِّكُمْ
وَمَكْفَرَةٌ لِلْسَّيِّئَاتِ وَمَنْهَاجٌ لِلْإِثْمِ**

Maksudnya: “Hendaklah kamu melakukan Qiyamullail kerana Qiyamullail adalah kebiasaan orang-orang soleh sebelum kamu. Qiyamullail mendekatkan diri kepada Allah, menghapuskan kesalahan-kesalahan dan mencegah dari dosa.” (Hadis Riwayat At-Tirmizi)

MUSLIMIN SIDANG HADIRIN YANG DIMULIAKAN ALLAH,

Mengakhiri khutbah kali ini, berikut adalah beberapa perkara yang boleh dijadikan pedoman:



Pertama: Satu pertiga akhir malam adalah waktu yang sangat istimewa bagi seorang mukmin. Membiarkan ia berlalu dengan begitu sahaja satu kerugian yang tiada tolok bandingan.

Kedua: Mukmin yang sempurna iman sangat yakin dengan janji Allah. Lantaran itu dia bersegera menyahut segala seruan yang Maha Agung.

Ketiga: Untuk menjadi insan soleh, kita mestilah berusaha mengikut jejak langkah orang-orang soleh. Menghidupkan malam dengan beribadah kepada Allah merupakan cara hidup mereka.

Keempat: Allah menjanjikan ganjaran Syurga yang kekal abadi bagi hamba yang ikhlas melazimi Qiyamullail.

تَتَجَافَى جُنُوبُهُمْ عَنِ الْمَضَاجِعِ يَدْعُونَ رَبَّهُمْ خَوْفًا وَطَمَعًا وَمِمَّا رَزَقْنَاهُمْ يُنفِقُونَ ﴿١٦﴾

Maksudnya: “Mereka menjauhkan (diri) mereka dari tempat tidur (sedikit sangat tidur kerana menunaikan solat tahajud dan amalan soleh), mereka berdoa kepada Tuhan dengan rasa takut (akan kemurkaannya) dan ingin memperoleh (keredhaan-Nya) dan mereka membelanjakan sebahagian daripada rezeki yang kami berikan kepada mereka.”

(Surah as-Sajadah ayat 16)

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ،
أَقُولُ مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ،
فَأَسْتَغْفِرُوهُ، إِنَّهُ هُوَ الْغَفُورُ الرَّحِيمُ.



Khutbah Kedua Bulan Mac

2024M/ 1445H

الْحَمْدُ لِلَّهِ عَلَى آلَائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعَظِيمًا لِحُشْنِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرِ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿٥٦﴾ [الأحزاب: 56]

اللَّهُمَّ صَلِّ وَسَلَّم عَلَى عَبْدِكَ وَرَسُولِكَ مُحَمَّدٍ نِ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ أَعِزَّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَانْصُرْ مَنْ نَصَرَ
الدِّينَ، وَاخْذُلْ مَنْ خَذَلَ الْمُسْلِمِينَ، وَأَعْلِلْ كَلِمَتَكَ إِلَى يَوْمِ الدِّينِ.



اللَّهُمَّ انْصُرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلَسْطِينَ وَفِي كُلِّ
مَكَانٍ، اللَّهُمَّ ثَبِّتْ إِيْمَانَهُمْ وَأَنْزِلِ السَّكِينَةَ فِي قُلُوبِهِمْ وَوَحِّدْ صُفُوفَهُمْ.

اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan
Agong, Sultan Ibrahim dan Kebawah Duli Yang Maha Mulia Seri
Paduka Baginda Raja Permaisuri Agong, Raja Zarith Sofiah.

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul
Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزَّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ
عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta dapat mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٩٠﴾ فَادْكُرُوا اللَّهَ الْجَلِيلَ
يَذْكُرْكُمْ، وَاشْكُرُوا عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١٩١﴾